

溫忠烈公遺稿
顏氏學記

一 全

新學
知

PDG

吳興劉氏
嘉業堂刊

溫忠烈公遺稿上

吳興叢書

烏程溫 璜述

母訓

節孝曰男子作家小事糊塗大事不糊塗婦人作家大事不當算小事要算

有力田不偷懶之勤僕無討債不侵財之廉僕

窮秀才譴責下人至鞭扑而極矣暫行知警常用則翫教兒子亦然

貧人不肯祭祀不通慶弔斯貧而不可返者矣祭祀絕是與祖宗不相往來慶弔絕是與親友不相往來名曰獨夫天人不祐

凡人家遺失真容者只宜就子姪相似者仿寫雖不甚肖神有所憑扶乩召魂是兒戲事

凡無子而寡者斷宜依向嫡姪爲是老病終無他諉祭祀近有感通愛女愛婿決難到底同住同住到底免不得一番擾攘官司也

凡寡婦雖親子姪兄弟只可公堂議事不得孤召密囑有婢僕者夜作明鐙往來

少寡不必勸之守不必強之改自有直捷相法只看晏眠蚤起惡逸好勞忙忙地無一刻丟空者此必守志人也身勤則念專貧也不知愁富也不知樂便是鐵石手段若有半晌偷閒老守終無結果吾有相法要訣曰寡

婦勤一字經

貧人弗說大話婦人弗說漢話愚人弗說乖話薄福人弗說滿話職業人弗說閒話

凡人同堂同室同窗同旅多年者情誼深長其中不無敗類之人是非自有公論在我當存厚道

世人眼赤赤只見黃銅白鐵受了斗米串錢便聲聲叫大恩德至如一鄉一族有大宰官當風抵浪的有博學雄才開人膽智的有高年先輩道貌誠心後生小子步其孝弟長厚終身受用不窮的這等大濟益處人却埋沒不題纔是陰德

但願親戚人人豐足甯我隻貧自守若使一人富厚九

族飢寒便是極缺陷處非大忍辱人不能周旋其間
周旋親友只看自家力量隨緣答應窮親窮眷放他便
宜一兩處才得消讒免謗

凡人說他兒子不肖還要照管伊父體面說他婆子不
好還要照管伊夫體面

有一等人攪販風聞拔舌地獄有一等人認定風聞指
爲左券布傳遠近拔舌地獄有一等人直腸直口自謂
不欺每爲造言捏謗者誘作先鋒爲害更甚拔舌地獄
貧家無門禁然童女倚簾窺幙鄰兒穿房入闥各以幼
小不禁此家教不可爲訓處

節孝謂介曰中年喪耦一不幸也喪耦事小正爲續絃

費處前邊兒女先將古來許多晚娘惡件填在胸坎這
邊新婦父母保婢唆教自立馬頭出來兩邊閒雜人占
風望氣弄去搬來外邊無千人聽得一句兩句只肯信
歹不肯信好真是清官判斷不開活佛調停不到不幸
之苦全在於此然則如之何只要做家主的一者用心
周到二者立身端正

人生只消受得一個巴字日巴晚月巴圓農夫巴一年
科舉巴三年官長巴六年九年父巴子子巴孫巴得歇
得便是好漢子

凡父子姑媳積成嫌隙畢竟上人要認一半罪過其胸
中橫豎道卑幼奈我不得

富家兄弟各門別戶最易生嫌勤邀杯酒時常見面此亦遠讒閒之法

貧人未能發跡先求自立只看幾人在坐偶失物件必指貧者爲盜藪幾人在坐羣然作弄必持貧者爲話柄人若不能自立這些光景受也要你受不受也要你受寡婦弗輕受人惠兒子愚我欲報而報不成兒子賢人望報而報不足

節孝謂介曰我生平不受人惠兩手拮据柴米不缺其餘有也挨過無也挨過

我生平不借債結會此念一起早夜見人不是

作家的將祖宗緊要做不到事補一兩件做官的將地

方緊要做不到事幹一兩件纔算是男子結果高爵多金還不算結果

節孝曰人言日月相望所以爲望還是月亮望日所以圓滿不久也你只看世上有貧人仰望富人的有小人仰望貴人的只好暫時照顧如十五六夜月日安得時時償你缺陷待到月亮盡情烏有那時日影再來光顧些須此天上榜樣也貧賤求人時時滿望勢所必無可不三思

兒子是天生的不是打成的古云棒頭出肖子不知是銅打就銅器是鐵打就鐵器若把驢頭打作馬面有是理否

遠邪佞是富家教子第一義遠恥辱是貧家教子第一義至於科第文章總是兒郎自家本事

貴客下交寒素何必謝絕蔬水往還大是美事只貴人減驕從便是相諒貧士少干謁便是可久之道也

朋友通財是常事只恐無器量的承受不起所以在彼名爲恩在我當知感古來鮑子容得管子卻是管子容得鮑子譬如千尋松樹任他雨露繁滋挺挺承當得起富貴之交意氣驟濃者當防其驟奪凡驟者不恆只平平自好

世間輕財好施之子每到骨肉反多患吝其說有二他人蒙惠一絲一粒連聲叫感至親視爲固然之事一不

堪也他人至再至三便難啟口至親引爲久常之例二不堪也但到此處正如啞子黃連說苦不得或兄弟而父母在堂或叔姪而翁姑尙在一團情分礪斧難斷稍有念頭防其干涉杜其借貸將必牢拴門戶狠作聲氣把天生一副惻怛心腸蓋藏殆盡方可坐視不救如此便比路人仇敵更進一層豈可如此汝深記我言

凡富家子弟交雜者雖在師位不可急離急離之則怨謗頓生不可顯斥其交顯斥之益固其合但當正以自持相機而導

介告母曰古人治生爲急一讀書生事嗇矣母曰士農工商各執一業各人各治所生讀書便是生活

節孝曰侃母高在何處介曰翦髮餉人人所難到母曰非也吾觀陶侃運甓習勞乃知其母平日教有本也

節孝曰吾族多貧何也介曰北自葵軒公生四子分田一千六百畝今子孫六傳產廢丁繁安得不貧母曰豈有子孫專靠祖宗過活天生一人自料一人衣祿若肯高低各職一業大小自成結果今見各房子弟長袖大衫酒食安飽父母愛之不敢言勞雖使先人遺百萬貲坐困必矣

謂介曰世人多被心腸好三字壞了假如你念頭要做好兒子須外面實有一般孝順行徑你念頭要做好秀才須外面實有一般勤苦行徑心腸是無形無影的有

何憑據凡說心腸好者都是規避樣子

中等之人心腸定是無他只爲氣質粗漫語言鄙悖外人不肯容恕當爾時豈得自恃無他將心唐突

人有父母妻子如身有耳目口鼻都是生而具的何可不一經理只爲俗物將精神意趣全副交與家緣這便喚作家人不喚讀書人

讀書到二三十歲定要見些氣象便是著衣喫飯也算人生一件事每見汝喫飯忙忙碌碌若無一絲空地及喫飯畢卻又閒蕩可是有意思人

世多誤認直字如汝讀書只曉讀書一路到底這便是直人汝自家著實讀書方說他人不肯讀書這便是直

言今人謂直卻方底罵圓蓋耳毒口快腸出爾反爾豈得直哉

節孝謂介曰治生是要緊事汝與常見不同吾辛苦到此幸汝成立萬一飢寒切身外閒論汝是何等人

貧富何常只要自身上通達得去是故貧當思通不在守分富當思通不在知足不闕祭享不失慶弔不斷書香此貧則思通之法也仗義周急尊師禮賢此富則思通之法也

謂介曰勞如我不成怯證世無病怯者苦如我不成鬱證世無病鬱者

事有可做不可講者如飢寒謀生受侮喫訟不得已而

應之一出口便齷齪矣事亦有可談不可做者如辟穀
燒丹劍仙俠客是也

做人家切弗貪富只如俗言從容二字甚好富無窮極
且如千萬人家浪費浪用儘有窘迫時節假若八口之
家能勤能儉得十口貲糧六口之家能勤能儉得八口
貲糧便有二分餘剩何等寬舒何等康泰

節孝曰前人辦得陰基陽基兩事可當子孫家產一半
兒時嘗與同學拆字曰心上加刃有忍害義以此名忍
可矣以爲忍耐者何居母應聲曰含刃在心鋒未及物
非耐而何介頓首曰聖人不能教人盡去心中之刃但
在制刃之心其陰消蜂螫於幾微者多矣如此妙解吾

母真聖人也

過失與習氣相別偶一差錯只算過誤至再至三便成習套此處極要點察

凡親友急難切不可閉門坐視然亦不可執性莽做世間事不是件件幹得纔喚幹人

讀書要學古人須看自家才具相仿的羊質虎皮妄自期許識者所恥

汝與朋友相與只取其長弗取其短如遇剛鯁人須耐他戾氣遇駿逸人須耐他罔氣遇樸厚人須耐他滯氣遇佻達人須耐他浮氣不徒取益無量亦是全交之法節孝曰閉門課子非獨前程遠大不見匪人是最得力

堂上有白頭子孫之福故舊聯絡一也鄉黨信服二也
子孫稟令童僕遺規三也談說祖宗故事與郡邑先輩
典型四也解和少年暴急五也照料瑣細六也

父子主僕最忌小處煩碎煩碎相對則面目可憎

節孝曰懶記帳籍亦是一病奴僕因緣爲奸子孫猜疑
成隙皆由於此

家庭禮數貴簡而安不欲煩而勉富貴一層繁瑣一層
繁瑣一分疏濶一分

人家子弟作揖高叫深恭絕好家法凡蒙師教初學須
從此起

凡子弟每事一稟命於所尊便是孝弟